

Fundaziun Gion Antoni Derungs

■ (cp) **A Cuirà è vegnida erigida ina «Fundaziun Gion Antoni Derungs» che includa ina grupp da promoziun en il senn dad ina «Societad Gion Antoni Derungs».** La fundaziun ha l'intent da segirar e render accessibel il relasch musical da l'important cumponist contemporan Gion Antoni Derungs (1935-2012), da derasar sia ovra e promover quella sin plaun naziunal ed internaziunal. Ella vegn presidiada da prof. em. HSG *Heinz Hauser*, S. Gagl. Ulteriurs commembers dal cussegl da fundaziun èn l'anterieur presi-

dent dal tribunal federal *Giusep Nay* sco vicepresidente, *Susi Derungs-Dicht* e *Susanne Bürgisser-Derungs* sco represchentantas da la famiglia, l'anterieur directur da la Pro Helvetia *Bernard Cathomas* ed il dirigent *Mario Schwarz*.

En la grupp da promoziun da la Societad Gion Antoni Derungs vegnan musicists, fautors, amis ed aderents da Gion Antoni Derungs envidads da contribuir a lur moda per cuntanscher las finamiras da la fundaziun. Questa grupp duai er dar la pussaivladad da girar las relaziuns ed il ba-

rat vicendaivel. Per la cussegliaziun professiunala prevesa la fundaziun in cussegl consultativ che duai sa cumponer da persunas dal fatg ord ils secturs da la musica e da l'animaziun culturala.

L'emprim cussegl da fundaziun definescha il proxim temp il program d'acziun cun ina calculaziun dals custs ed in concept da finanziaziun. Ina emprima finamira pli gronda è da realisar per l'80avel anniversari dal cumponist l'onn 2015 ina acziun cumplexiva che dat a sia ovra ina vasta preschientscha publica.



Per pudair segirar e render accessibel il relasch musical da l'important cumponist contemporan Gion Antoni Derungs è vegni fatg ina fundaziun.